

E-voting sin l'onn 2020

■ (anr/ac) La regenza grischuna vesa l'introducziun dad in sistem da votar electronic sin il pli tard l'onn 2020. Dad ina purschida intermediara per exempel a favur da personas cun impediment u Svizzers cun domicil en l'exteriur vul la regenza desister, sco ella scriva en ina resposta ad ina dumonda da la deputada Tina Gartmann (ps Cuira). Personas cun impediment èn tenor las explicaziuns da la regenza grischuna ina impurtanta gruppa enten planisar ina plattafurma dad e-voting. En la resposta vers ina dumonda da la deputada *Tina Gartmann* (ps Cuira) scriva la regenza da gia esser s'engaschada per quella gruppa da votantas e votants cun ulteriurs representants chantunals enteifer l'evaluaziun dal consorzi Vote électronique per introducir in sistem da votar electronic senza barrieras. L'enconuschientscha principala da la gruppa da lavur saja quella ch'ina soluziun speziala da votar electronic per personas cun impediment saja bain pussaivel. Introducir in tal sistem na saja dentant betgen in il senn da las personas cun impediment. En il center stoppia l'indipendenza da tut ils umans star. Tuttas mesiras che vegnian introducidas cun il sistem dad e-voting stoppian esser uschè simplas sco pussaivel e star a disposiziun a tut ils utilisaders, scriva la regenza en sia resposta. La regenza è vinavant da l'opiniun ch'il sistem da votar electronic sappia ademplir tuttas premissas pertutgant il diever e l'access per pussibilitar a tut ils umans dad exequir independentamain ils dretgs politics. Il sistem dad e-voting stoppia esser simpel d'appplitgar e tuttina segir. Dad introducir in sistem intermediar a favur da singulas gruppas vul la regenza desister, sco ella scriva en la resposta. Ella vul in sistem a favur da tuttas votantas e tuts votants e quai sin il pli tard l'onn 2020.



Deputada Tina Gartmann, ps Cuira.

MAD

Collavurar cun la chanzlia federala

Cuntanscher quella finamira quinta la regenza grischuna da cuminanza cun la chanzlia federala. Ella ha menziunà la terza fasa d'emprova che saja bainprest terminada. Damai che la chanzlia federala ha renvià la concessiun al consorzi Vote électronique per las elecziuns naziunalas da l'onn 2015 haja quel consorzi decidì da na cuntinuar e da sa schliar. Avisà ha la regenza grischuna in sistem per la votaziun electronica purschida da la Posta e dals chantuns Neuchâtel e Geneva. En la resposta a la deputada Gartmann ha la regenza skizzà il plan per introducir il sistem da votaziun electronic sin il pli tard l'onn 2020. Il cas ideal vesa or uschia ch'il cussegl grond vegn infurmà l'onn 2017 davart las resursas ed ils basegns finanzials. Uschia che deputadas e deputads pon decider il credit e las midadas legalas. Acquistar il sistem vul il chantun l'entschatta 2018. Suenten ina curta fasa d'emprova cun singulas vischnancas vul la regenza grischuna introducir il sistem dad e-voting sur l'entir intsches dal chantun l'onn 2020.